

Dianan 14 y 15 di november

Cas di Cultura ta presenta e obra teatral 'Requiem 350' Ode to Rembrandt'



ORANJESTAD (AAN): Vicky Arens, a anuncia cu Cas di Cultura ta bay ta presentando su produccion mas nobo inspira riba e Maestro Pintor di e Era di Oro, Rembrandt van Rijn.

E obra, e experiencia teatral yama 'REQUIEM 350 | Ode to Rembrandt', conmemorando cu na 2019 ta 350 aña pasa cu el a fayece, lagando atras un herencia invaluable pa mundo henter.

Rembrandt a nace cu un talento cu e'la persevera pa cultiva y den su tempo e tabata tin exito caba como pintor di potret di personanan di rangonan alto di sociedad, sinembargo tambe a portrata e persona comun di ciglo 17. Sin lubida cu e'la pinta su mes al rededor di 100 biaha, cu ta dunele e apodo actual di e prome rey di 'selfie'.

E obra ta explora, riba un manera contemporaneo y moderno su gran obra 'De Nachtwacht', cu ta circula un mito rond di dje. E maestro di luz y scuridad tabata un homber complica, profundo, devoto y cu a stima hopi tambe.

Rembrandt no a fayece como persona rico, sin embargo su obranan ta wordo bendi awe pa decenas di miyones di dollar. E ta pone nos refleha riba arte y su balor en general.

Ta yama danki na sostenedornan y colaboradornan di e proyecto. Actuacion poderoso, baile dinamico, musica mane di pelicula, canto urbano, efectonan di luz y arte visual tur ta traha localmente cu colaboracion y creacion firme di e integrantenan tambe, ta haci 'REQUIEM 350 | Ode to Rembrandt' un obra local unico y diferente, cu ta pone nos celebra creacion y arte.

Tambe e ta subraya e posicion den Reino Hulandes, un herencia cu Aruba tambe ta comparti, asina creando lasonan positivo. 'REQUIEM 350 | Ode to Rembrandt' ta bou di direccion artistico di Olga van Bochove.

E elenco ta consisti di Beach Lama, Jhon Freddy Montoya, Ephrayim Odor, Tuesday Irwin, Astra Paesch, Tyron Chirino, Djurwin Brito, Dijon Inesia, Marvin Rouse, Roberta Romelli y Leonardo Philips. Adriano Nanof a encarga cu musica y zonidonan special. E teamnan di Cas di Cultura y Elite a traha riba luz, video arte digital y efecto.

Scolnan basico y secundario a confirma 3600 alumno pa presencia e obra y lo tin dos funcion pa publico dianan 14 y 15 di november pa 8pm.

Telefonnan di DIARIO
582-6747 Fax 582-8551